

Na osnovu člana 16. Zakona o Vladi Unsko-sanskog kantona („Službeni glasnik Unsko-sanskog kantona“, broj: 05/08), člana 40. Zakona o izvršenju Budžeta Unsko-sanskog kantona za 2016. godinu („Službeni glasnik Unsko-sanskog kantona“, broj: 1/16), članova 6.; 10. i 29. Zakona o novčanim podrškama u primarnoj poljoprivrednoj proizvodnji na Unsko-sanskom kantonu („Službeni glasnik Unsko-sanskog kantona“, broj: 07/08 i 4/12) Vlada Unsko-sanskog kantona na sjednici održanoj dana, 27.04.2016. godine, d o n o s i:

O D L U K U

o vrsti, osnovnim kriterijima i načinu ostvarivanja novčanih podrški u primarnoj poljoprivrednoj proizvodnji iz Budžeta Unsko-sanskog kantona za 2016.godinu.

OSNOVNE ODREDBE

Član 1.

- 1) Ovom Odlukom utvrđuju se vrste, osnovni kriteriji i način ostvarivanja novčanih podrški u primarnoj poljoprivrednoj proizvodnji (u daljem tekstu: Novčane podrške) iz Budžeta Unsko-sanskog kantona za 2016.godinu (u daljem tekstu: Budžet USK-a).
- 2) Novčane podrške iz ove Odluke ostvaruju pravna i fizička lica (u daljnjem tekstu: Korisnici) prema kriterijima propisanim u Uputstvu za ostvarivanje kantonalnih novčanih podrški u primarnoj poljoprivrednoj proizvodnji za 2016. godinu (U daljem tekstu: Uputstvo) Ministarstva poljoprivrede, vodoprivrede i šumarstva Unsko-sanskog kantona (U daljem tekstu: Ministarstvo).
- 3) Ministarstvo će vršiti poslove realizacije novčanih podrški u primarnoj poljoprivrednoj proizvodnji iz Budžeta USK-a u saradnji sa: Općinskim/gradskim poljoprivrednim službama Unsko-sanskog kantona (U daljem tekstu: Općinska/gradska poljoprivredna služba), Upravom za inspeksijske poslove Unsko-sanskog kantona, Poljoprivrednim zavodom Unsko-sanskog kantona, Veterinarskim zavodom i drugim organizacijama.
- 4) Na osnovu zahtjeva Korisnika za isplatu novčanih podrški, kontrole osnovanosti zahtjeva i dokumentacije od strane uposlenika Odsjeka za novčane podrške o ispunjavanju uvjeta za ostvarivanje prava na novčanu podršku i obračuna visine naknade, Ministar poljoprivrede, vodoprivrede i šumarstva Unsko-sanskog kantona (U daljem tekstu Ministar) odobrava isplatu novčane podrške iz Budžeta USK-a putem Ministarstva finansija Unsko-sanskog kantona - Trezora.
- 5) Na osnovu stava 3, člana 2. Zakona o novčanim podrškama u poljoprivredi i ruralnom razvoju („Službene novine Federacije Bosne i Hercegovine“ broj: 42/10) Federalno ministarstvo poljoprivrede, vodoprivrede i šumarstva i kantonalna ministarstva nadležna za poslove poljoprivrede dužna su osigurati provođenje harmonizacije.

VRSTE NOVČANIH PODRŠKI

Član 2.

- 1) Novčane podrške u primarnoj poljoprivrednoj proizvodnji ostvaruju se za slijedeće vrste novčanih podrški:

| Šifra | Vrsta proizvodnje | Jedinica mjere | Količina | Iznos u KM/jedinica mjere | UKUPNO KM |
|----------|---|----------------|--------------|---------------------------|---------------------|
| A-1 | Sufinansiranje laboratorijskih pretraga mlijeka i nabavke goriva za proljetnu sjetvu 2016. godinu | litara | 18.500.000 | 0,10 | 1.850.000,00 |
| A-2 | Uzgoj rasplodnih junica | grlo | 700 | 350,00 | 245.000,00 |
| A-3 | Tov junadi | grlo | 30 | 300,00 | 9.000,00 |
| A-4 | Držanje koka nesilica | komad | 15.000 | 0,70 | 10.500,00 |
| A-5 | Sufinansiranje pretraga na američku gnjiloću kod pčela | društvo | 19.000 | 6,00 | 114.000,00 |
| A-6 | Proizvodnja riblje mladi | komad | 2.170.000 | 0,03 | 65.100,00 |
| A-7 | Uzgoj autohtone pasmine – Bosanska buša | grlo | 50 | 100,00 | 5.000,00 |
| A-8 | Uzgoj autohtone pasmine – Domaći balkanski magarac | grlo | 30 | 50,00 | 1.500,00 |
| B-1 | Proizvodnja povrća na otvorenom: kornišoni, paprika, paradjz, luk, cikla | kg | 2.350.000 | 0,10 | 235.000,00 |
| B-2/2015 | Obaveze iz 2015. godine | kg | 153.405,49 | 0,40 | 61.362,20 |
| B-2 | Proizvodnja jagodičastog voća: (malina,kupina,borovnica, jagoda i aronija) | kg | 1.829.594,50 | 0,40 | 731.837,80 |
| B-3 | Proizvodnja povrća, jagode i cvijeća u zatvorenom prostoru | m ² | 53. 000 | 3,00 | 159.000,00 |
| B-4 | Ostvarivanje novčane podrške za nabavku sadnica jagodičastog voća (malina,kupina,borovnica, jagoda i aronija) | ha | 15 | 2.000,00 | 30.000,00 |
| B-5 | Proizvodnja gljiva | m ² | 4.800 | 1,50 | 7.200,00 |
| B-6 | Proizvodnja kontejnerskih presadnica povrća | komad | 80.000 | 0,05 | 4.000,00 |
| C-1 | Ostvarivanje prava na novčane podrške za podizanje novih plastenika i staklenika | m ² | 1.000 | 3,00 | 3.000,00 |
| C-2 | Sufinanciranje izrade mliječnog kartona | grlo | 10.000 | 4,00 | 40.000,00 |
| C-3 | Novčane podrške ostvarene na osnovu prava u ponovljenim postupcima prema ZUP-u | | | | 6.000,00 |
| | UKUPNO: | | | | 3.577.500,00 |

OSNOVNI KRITERIJI ZA OSTVARIVANJE NOVČANIH PODRŠKI

Član 3.

Opći kriteriji:

- 1) Fizičko ili pravno lice koje je ostvarilo primarnu poljoprivrednu proizvodnju ili djelatnost u 2016. godini na području Unsko-sanskog kantona (U daljem tekstu: Kanton), a koji se vodi u registru poljoprivrednih proizvođača kod općinskih/gradskih službi za poljoprivredu i koji su upisani u Registar poljoprivrednih gazdinstava i Registar klijenata stiče pravo na ostvarivanje novčane podrške.
- 2) Fizičko lice koje nema dospjelih, a neizmirenih poreznih obaveza za prethodnu godinu prema Kantonalnoj poreznoj upravi stiče pravo na ostvarivanje novčane podrške. (Za korisnike koji nisu u sistemu PDV-a).
- 3) Fizičko i pravno lice koje nema dospjelih, a neizmirenih poreznih obaveza prema Kantonalnoj poreznoj upravi i poreznih obaveza prema Upravi za indirektno oporezivanje Bosne i Hercegovine za prethodnu godinu stiče pravo na ostvarivanje novčane podrške. (Za korisnike koji su u sistemu PDV-a)
- 4) Fizička i pravna lica koja redovno ispunjavaju svoje dospjele obaveze po zaključenim ugovorima o robnim, robno-novčanim kreditima i koncesijama sa Ministarstvom stiču pravo na ostvarivanje novčane podrške u skladu sa članom 7. stav 1. tačka 7. Zakona o novčanim podrškama u primarnoj poljoprivrednoj proizvodnji na Unsko-sanskom kantonu, (U daljem tekstu: Zakon o novčanim podrškama).
- 5) U slučaju da se utvrđena kvota po vrstama novčanih podrški unutar jedne oblasti, radi objektivnih okolnosti u cjelosti ili djelimično ne iskoriste Ministarstvo će svojom odlukom omogućiti da se neutrošena sredstva usmjere na druge stavke unutar te oblasti.
- 6) U slučaju da se utvrđena kvota po vrstama sredstava radi objektivnih okolnosti djelimično ne iskoristi, Ministarstvo ima pravo da preusmjeri sredstva iz oblasti u oblast uz prethodno pribavljenu saglasnost Vlade Unsko-sanskog kantona.
- 7) U slučaju opravdane inicijative i potrebe da se u Odluku vanredno ugradi nova vrsta novčane podrške, a da se sredstva upotrijebe iz stavke rezervnog fonda ili iz već ugrađenih stavki u ovoj Odluci, a čija sredstva nisu u cjelosti utrošena, Vlada Unsko-sanskog kantona će na prijedlog Ministarstva, posebnom Odlukom odobriti formiranje nove stavke ili vrste novčane podrške i korištenje finansijskih sredstava iz rezervnog fonda ili iz već ugrađenih stavki za isplate nove vrste novčane podrške.
- 8) U slučaju da novčana sredstva budu nedostatna i pored primjene prethodna tri stava, a podnosioci zahtjeva za ostvarenje prava na novčane podrške ispunjavaju sve uslove propisane Zakonom o novčanim podrškama, Odlukom i Uputstvom, nedostajuća finansijska sredstva će se isplatiti iz Budžeta za 2017.godinu.

Član 4.

Posebni kriteriji:

- 1) Novčanu podršku za Sufinansiranje laboratorijskih pretraga kvalitete mlijeka i nabavke goriva za proljetnu sjetvu 2016. godine (A-1) ostvaruju proizvođači svježeg kravljeg, ovčijeg i kozjeg mlijeka koji su plasirali mlijeko registriranom otkupljivaču mlijeka na području Bosne i Hercegovine u III i IV kvartalu 2015. godine. Visina podrške iznosi 0,10 KM/litar isporučenog mlijeka. Najmanja količina plasiranog mlijeka za koju se može ostvariti novčana podrška iznosi 500 litara.
- 2) Novčanu podršku za uzgoj rasplodnih junica (A-2) ostvaruju registrovani uzgajivači čiji je rasplodni podmladak registrovan u Uzgojno-selekcijskoj službi USK-a (U daljem tekstu: Uzgojno-selekcijaska služba) i obilježen u skladu sa Pravilnikom o obilježavanju životinja i šemi kontrole kretanja životinja (Službeni glasnik BiH, broj: 28/03), a isti mogu koristiti za vlastiti uzgoj ili prodaju, ako uzgoje jednu rasplodnu junicu. Visina novčane podrške iznosi 350 KM/grlo.
- 3) Novčanu podršku za tov junadi (A-3) ostvaruju uzgajivači tovne junadi čija su grla registrovana u Uzgojno-selekcijskoj službi i obilježena u skladu sa Pravilnikom o obilježavanju životinja i šemi kontrole kretanja životinja (Sl. glasnik BiH, broj: 28/03), a koji utove i plasiraju dva juneta u jednom turnusu i iste plasiraju registriranoj (odobrenoj) klaonici ili otkupljivaču koji je u sistemu PDV-a, a koji ima ugovor o uslužnom klanju sa registriranom (odobrenom) klaonicom.
 - a) Proizvođači tovne junadi mogu ostvariti pravo na podršku za maksimalno dva turnusa tokom godine.
 - b) Pravo na novčane podrške za tov junadi imaju tovljači sa najmanjim ostvarenim prirastom od 250 kg/grlo kod ženskih grla i 300 kg/grlo kod muških grla, sa najmanjom izlaznom težinom od 500 kg žive vage. Visina novčane podrške iznosi 300 KM/grlo.
- 4) Novčanu podršku za držanje koka nesilica (A-4) ostvaruju proizvođači koji u 2016. godini drže najmanje 1.000, a najviše 5.000 komada koka nesilica u proizvodnji jaja. Visina novčane podrške iznosi 0,70 KM/komad.
- 5) Novčanu podršku za sufinansiranje pretraga na Američku kugu kod pčela (A-5) ostvaruju pčelari koji na svom pčelinjaku posjeduju najmanje 20 aktivnih pčelinjih društava i koji su uradili pretrage na Američku kugu u pčelinjaku. Visina novčane podrške iznosi 6,00 KM/pčelinje društvo.
- 6) Novčanu podršku za proizvodnju riblje mladi (lipen i pastrmka) (A-6) ostvaruju registrirani proizvođači riblje mladi koji proizvedu i plasiraju najmanje 300.000 komada riblje mladi. Visina podrške iznosi 0,03 KM/komad riblje mladi.
- 7) Novčanu podršku za uzgoj autohtone pasmine goveda bosanska buša (A-7) ostvaruju registrovani uzgajivači čija su rasplodna grla (muška i ženska) registrovana u Uzgojno-selekcijskoj službi i obilježena u skladu sa Pravilnikom o obilježavanju životinja i šemi kontrole kretanja životinja (Službeni glasnik BiH, broj: 28/03), a ista mogu koristiti za vlastiti uzgoj ili prodaju, ako u uzgoju imaju najmanje dva (2), a najviše (30) grla starija od dvije godine. Visina novčane podrške iznosi 100 KM/grlo.

8) Novčanu podršku za uzgoj autohtone pasmine domaći balkanski magarac (A-8) ostvaruju registrovani uzgajivači čija su rasplodna grla (muška i ženska) obilježena od strane veterinarske organizacija i registrovana u Uzgojno-selekcijskoj službi, a ista mogu koristiti za vlastiti uzgoj ili prodaju, ako u uzgoju imaju najmanje dva (2) grla, a najviše (20) grla starijih od jedne (1) godine. Visina novčane podrške iznosi 50 KM/grlo.

9) Novčanu podršku za proizvodnju povrća na otvorenom: kornišon, paradajz, paprika, luk i cikla (B-1), ostvaruju proizvođači koji zasiju i proizvedu povrće na najmanjoj površini od 0,1 ha - 0,5 ha i plasiraju povrće registriranom otkupljivaču i/ili prerađivaču povrća, a koji je u sistemu PDV-a. Visina novčane podrške iznosi 0,10 KM/kg plasiranog povrća. Najmanja količina plasiranog povrća za koju se može ostvariti novčana podrška iznosi od 2.000 kg

10) Novčanu podršku za proizvodnju jagodičastog voća (B-2) ostvaruju proizvođači koji proizvedu i plasiraju jagodičasto voće registriranom otkupljivaču i/ili prerađivaču jagodičastog voća, a koji je u sistemu PDV-a. Visina novčane podrške iznosi 0,40 KM/kg plasiranog jagodičastog voća. Najmanja količina plasiranog jagodičastog voća za koju se može ostvariti novčana podrška iznosi 1.000 kg po jednom prerađivaču/otkupljivaču.

11) Novčanu podršku za proizvodnju povrća, jagode i cvijeća u zatvorenom prostoru (B-3) ostvaruju proizvođači koji zasade i proizvedu povrće, jagode i cvijeće na najmanjoj površini od 200 m². Visina podrške iznosi 3,0 KM/m² zasađene površine.

12) Novčanu podršku za nabavku sadnica jagodičastog voća za podizanje novih višegodišnjih zasada (B-4), ostvaruju proizvođači koji u 2016. godini podignu zasad na površini od 0,1 do 0,5 ha jagodičastog voća. Visina podrške iznosi 2.000,00 KM/ha zasađene površine.

13) Novčanu podršku za proizvodnju gljiva (B-5) ostvaruju korisnici koji zasnuju proizvodnju i proizvedu gljive na najmanjoj površini supstrata od 50 m² do maksimalno 500 m², a iste plasiraju na tržište. Visina novčane podrške iznosi 1,50 KM/m² supstrata.

14) Novčanu podršku za proizvodnju kontejnerskih presadnica povrća (B-6) imaju korisnici koji su upisani u Registar proizvođača sjemena, presadnica, micelija jestivih i ljekovitih gljiva kod Federalnog ministarstva poljoprivrede, vodoprivrede i šumarstva, a koji proizvedu od 10.000 do 40.000 kontejnerskih presadnica povrća (paradajza, paprike i krastavaca) u skladu sa Zakonom o sjemenu i sadnom materijalu poljoprivrednog bilja. Visina podrške iznosi 0,05 KM/komadu.

15) Novčanu podršku za podizanje novih plastenika i staklenika (C-1) ostvaruju proizvođači koji u 2016. godini podignu plastenik ili staklenik minimalne površine od 100 m² i ostvare najmanje jednu proizvodnju u 2016. godini. Visina novčane podrške iznosi 3,00 KM/m² novo podignutog plastenika ili staklenika.

16) Novčanu podršku za sufinansiranje izrade mliječnog kartona (C-2) ostvaruju veterinarske organizacije na području Kantona. Visina novčane podrške iznosi 4,00 KM/grlu za koje je urađen mliječni karton. Poljoprivredni proizvođač će uplatiti razliku do punog iznosa izrade mliječnog kartona, veterinarskoj organizaciji.

17) Novčane podrške ostvarene na osnovu prava u ponovljenim postupcima (C-3) provedenim na osnovu žalbi, po provedenim pravomoćnim sudskim presudama u oblasti novčanih podrški iz prethodnih godina, i da u naknadno određenom roku dopune svoje zahtjeve dokumentacijom koja nedostaje (član.67. i 135. ZUP-a) (C-3).

NAČIN OSTVARIVANJA NOVČANIH PODRŠKI

Član 5.

- 1) Novčane podrške se ostvaruju na način propisan u Uputstvu Ministarstva.
- 2) Obradu svakog zahtjeva za isplatu novčanih podrški i obima traženih sredstava će vršiti Odsjek za novčane podrške u skladu sa Uputstvom.
- 3) Odsjek za novčane podrške je u obavezi da vodi evidenciju primljenih i obrađenih zahtjeva.

Član 6.

Radi koordinacije aktivnosti po podrškama, zadužuje se Ministarstvo finansija - Trezor da mjesečno u pisanoj formi, izvještava Ministarstvo o izvršenju isplata za sve vrste

Član 7.

Nadzor nad sprovođenjem ove Odluke vrši Ministarstvo u saradnji sa Kantonalnom upravom za inspekcijske poslove, svako u okviru svojih nadležnosti.

Član 8.

Za realizaciju ove Odluke zadužuju se Ministarstvo i Ministarstvo finansija - Trezor, svako u okviru svojih nadležnosti.

Član 9.

Zadužuju se Ministarstvo poljoprivrede, vodoprivrede i šumarstva i Ministarstvo finansija, da Vladi Unsko-sanskog kantona dostave na kraju budžetske godine izvještaj i analizu o realizaciji novčanih podrški i z ove Odluke.

Član 10.

Ova Odluka stupa na snagu danom donošenja i objavice se u "Službenom glasniku Unsko-sanskog kantona".

Broj: 03-017-1378/2016
Bihać, 27.04.2016. godine

